

Pol ile malueng ako i wat i a toko lemioongare nge ako o voth a rem a Kolosi

Kolosi

Ritetong nge a Kolosi

Ava Pol i voth a mang a midenga lemi ako a rem pomnga a Rom, na i wat malueng ake a toko lemioongare nge ako o voth a Kolosi ako a epee a Esia. (Pakekere ole Omaing 28:16-21) Nge wop lemi aken i wat mun malueng or aini, e a Pilemon nge, na e a Epesus angare nge. Na Kolosi anga pelie o velpol ini toko lemioongare ako nge a Pol ile panongpolong avele, ava ini inga a Epapras ako i nongpol Panongpolong Sivenga ako Pol i panongpol Epesus angare nge, mako i es ma i panongpol Kolosi angare nge. (1:7-8; Pakeke 19:10) Pol i wat malueng ake mo aro i tor Kolosi angare ole nge pamirealonga le apaltetongare ole riong le apaltetonga pulua. Ranga ve ako o paroro nang pelie, (2:16) na o paroro mun enselre. (2:18) Na o sis ve aro toko alavusnga aro o panes a Moses ile patorong, (2:21, 26) naro o panes mun vothung ako nge toko ini peti isnga. (2:11) Na olo wom inga nge mire ulue anga panesnga, na o rivenga mire aken panesnga aro i sung mimiong sivenga a tokokoere nge. (2:4, 8, 18) Aveto Pol ilo wom rintet nge a Krai ipanesnga, na i ri ve ienga inga i pavurvur ako aro i el werer it, na ini inga a God ia sei. (1:15) Krai i pamenu ur alavusnga nomenga. (1:16) Na nge a Krai ile engenging ur alavusnga o voth pis a omei. (1:17) Krai ini toko teltelnga ako i los werera nge rinong. (1:18) Na Krai ome a God kene o thun inga. (1:19; 2:9) Krai i pamu werer ur alavusnga a God nge. (1:20-22) Maken Krai i mukal nge ur alavusnga, na i pavurvur rintet nge pamiminger. Aken ini ur aolonga ako malueng ake i ri nge.

Ur alavusnga i voth a Krai isa thewo, na God ile mimiong na ile vothung i vual a i nge

(Vonge 1:1–3:4)

1 ¹Tho ini a Pol ako God i panes ilemi ma i atéal tho ve tho ini a Krai Jisas ile pakeke na titeir a Timoti i voth tomo nge tho.

²Tho wat malueng ake a thomu titeikre ako ini a God ile toko riringare ako a Kolosi, thomu ako o teo a Krai nge na o panes senu i.

Aro Titemer a God aro i sungu ile themosaling na ile lemi moring a thomu nge.

Pol i ri sivengaing a God nge, nge Kolosi angare.

³Na nge nang elonga ako them nong nge thomu, them ri sivengaing a God nge ako ini ar Pomnga a Jisas Krai Itema, ⁴eneke them nongpol nge lomu lemioong nge a Krai Jisas na nge lomu asaguong nge a God ile toko lemioonga alavusnga. ⁵Na nomenga nge wop lemi ako thomu o nongpol riong nunganga ako ini Panongpolong Sivenga na lomumuo nge, thomu o nongpol nge ur ako God i monsi i lale a Pen a Urvet ve aro i sungu i a thomu nge, mako o men sial i. Na lomu men sialing nge ur sivenga aken i pavelpol lomu lemioong na lomu asaguong aken. ⁶Na Panongpolong Sivenga ako i velpol a thomu nge, toko pulua a pen elonga ake ru a ulue o nongpol mun i, na i pavelpol monnga a ole mimiong ranga ve ako i pavelpol ol monnga a lomu mimiong, nomenga i patea nge nang ako thomu o nongpol i, na lomumu i nine nge ako God ile themosaling nge toko alavusnga i nunganga. ⁷Na Epapras kene i patoral thomu nge a God ile themosaling aken. Na ini a Krai ile umonga tomo nge them, na i oma senu a Krai ile omaing. Na ar sagu i na i opoal them nge lememaing. ⁸Ma i ritet them nge lomu asaguong ako Oni Riringa i pavelpol i a thomu nge.

Pol i nong a God nge mo i paengeng Kolosi angare olemi.

⁹Mako i patea nge nang ako Epapras i ritet them nge thomu, na them pesrou nge nongong nge thomu avele. Na them nong a God nge ve aro i panine lomu mire mo i aolonga nge Ioni Riringa ile omaing, maken aro lomu mire i nine senu nge ur ako God i sis ve aro thomu o oma i. ¹⁰Na them nong venen aken, mo aro thomu o nak menong ako aro Toko Pomnga ilemi i sivenga nge, naro ilemi i sivenga mun nge lomu omaing alavusnga, naro thomu o pavelpol omaing sivesivengare, naro lomu mire nge a God aro i aolonga. ¹¹Na them nong nge a God mo aro i paengeng thomu nge ile engenging elonga mo i pavurvur nge ile engenging aolonga ako i pathengal i a tokokoere nge lale, mo aro thomu o mit engeng mun nge matheongre potunnga, naro keumu a riong nge avele, naro lomumu

i ngo senu inga nge. ¹²Na them nong mun ako aro thomu o ri sivengaing a Titemer nge ako i oma thomu mo aro thomu o el mun ur areko i atéal i nge ile tokokoere ako a Pen a Urvet ako i vual nge pen lalanga. ¹³Na thomu o pavurvur nge ur aken elnga, eneke i eltetpot it a Satan imeni a mideng lemi, mako i paeso it a Itun ako ia sagu rintet i, a imeni nge. ¹⁴Na nge Itun ile omaing, ilemi simikal ler vothung kerengare ma i ol werer it.

Pol i ri nge a Krai ile mimiong na ile omaing.

¹⁵Na toko e avele i pavurvur aro i thopol a God, aveto te thopol a God ia sei ako a Itun nge. Na God ia tengen aken i voth tel, na i mukal nge ur alavusnga ako i pamenu ir. ¹⁶Eneke ini ur alavusnga opateanga ma i pamenu ur alavusnga ako a Pen a Urvet na ulue, ur areko te thopol ir, tomo mun nge ur areko te thepol ir avele, ranga ve ini ensel engengare, na tamata kerengare, na meleunre, na ur engenga ako o voth a malang po. Na Itun i pamenu ur alavusnga mo aro ur alavusnga o pavothal nge i. ¹⁷Na ur e avele i velpol rongan, na Krai i voth tel lale, na nge ienga inga ur alavusnga o voth pis a omei. ¹⁸Na ini ile toko lemioongare opounga. Na toko lemioongare o ranga ve ini ilopat na o el mun ole mimiong a i nge, eneke ini a God ia tengen ako i palos werera tel i nge rinong mo aro i mukal nge ur alavusnga. ¹⁹Ma ini a God ia sei, eneke God i atéal i ve aro isivenga i vual rintet a i nge. ²⁰Na God ilemi ako ve, aro ur alavusnga ako i voth a ulue na Pen a Urvet, aro o lo werer a i nge la, mako i sungpot Itun mo aro i rin a won ngoronga nge mo ia mla i pavelpol lemi moring a it nge.

²¹Na nomenga thomu o voth mela a God nge, na lomu ngarang mun i, eneke nge lomu lemi rumong kerenga na lomu vothung kerengare. ²²Aveto ponange i pavelpol titeinpeling tomo nge thomu, nge Itun ile rinong ako o pun rin i alamimminga. Na i oma venen aken mo aro thomu o riri rintet, na o vengveng, na omu theki e avele, ²³tova ve lomu lemioong i voth engeng inga ako a i nge, na o mit engeng, na o men sial engeng nge ur ako o nongpol i nge Panongpolong Sivenga. Ma tho a Pol, tho ini a God ile umonga nge Panongpolong Sivenga ake. Na Panongpolong Sivenga ake i kimapot a pen elonga ake ru a ulue.

Pol i ritet nge ile omaing ako God i sungu i a i nge.

²⁴Na nge wop lemi ake, lemik sivenga inga nge sisosong ako tho el i nge lek omaing ako tho panongpol areko or ini Judare avele, ranga ve ini thomu. Na tho patopalal sisosong ako rongan i voth, ako Krai i atéal i ve aro tho el i, mo aro tho opoal ile toko lemioongare. Or kene o ranga ve ini ilopat. ²⁵Na God inga ako i atéal tho ve tho ini toko lemioongare ole umonga ako aro tho panongpol thomu areko thomu ini Judare avele nge a God ile riong elonga. ²⁶Ako nge ile riong inkinenga ako nomenga

i ngo kine a pompomere nge, aveto ponange God i pathengal ol i a ile tokokoere nge. ²⁷Na i atéal or ve aro olemi mire ako ve, ile riong inkinenga aken i ri ve, God aro i oma senu rintet mun nge areko or ini Judare avele. Na ile omaing aken i mirenga ve, aro ve Krai i voth a opomu lemi, aro thomu o men sial ol nge ur sivesivengare ako a Pen a Urvet.

²⁸Make them panongpol toko alavusnga nge a Krai. Na them tor ole na them pamireal or nge mire elonga ako God i sungu i a them nge, mo aro nge lemém omaing aken aro o motu nge ole teong a Krai nge tova o mit a God itheki. ²⁹Na ake ini lek omaing ako lok vur rintet nge omanga, nge a Krai ile engenging aolonga alavusnga ako i voth a tho nge.

**Pol i paengeng Kolosi angare ole lemioong na i panakal
mun or nge patoraling le apaltetongare.**

2 ¹Tho sis ve aro lomumu mire nge lek omaing ako lok vur nge, ma i opoal thomu na toko lemioongare ako a Laodisia, tomo nge areko o thopol mun tho rongan. ²Na tho um engeng venen aken mo aro tho paengeng olemi, naro ole asagupeling aro i veliloalo or, maken aro o vual rintet nge lemi rumong sivenga elonga mo aro olemi mire nge a God ile riong inkinenga ako ini a Krai. ³Na Krai ienga inga i pango pat a God ile mire na ile lemi rumong ninenga. Na nge ler teong a i nge, te el ur sivesivenga areke ako i ngo kine nomenga. ⁴Na tho ri venen aken, eneke nik plong ve aro toko pelie o ri ololo thomu, nge ole riong pelie ako i tang ranga ve ini riong nunganga. ⁵Eneke tho kene tho voth tomo nge thomu avele, aveto lemik i voth tomo nge thomu. Na lemik sivenga nge ako thomu o mit engeng nge lomu lemioong nge a Krai, na toko e avele i pavurvur aro i atiteu lomu mitong.

Teong inga ako a Krai nge i pavelpol mimiong nunganga.

⁶Na nge lomu lemioong, thomu o elo a Jisas Krai a opomu lemi na ini omu pomnga. Na o kis inga lomu lemioong a i nge, nge lomu mimiong ako ranga ve thomu o teo a i nge. ⁷Naro thomu o mit engeng a i nge ranga ve ini won ako iriripi i teu a ulue lemi. Naro thomu o pamit engeng lomu mimiong a i nge ranga ve ini vel ako o ari i nge wovek papesnga. Naro thomu o paengeng lomu lemioong ranga ve ako o patoral thomu nge, naro evelelnga aro thomu o ri sivengaing a God nge.

⁸Aro thomu o nakalal thomu nge toko le apaltetongare ole riong, aro vene mo thomu o ting nge ole ri ololoing. Na ole riong ini ur polpolnga na i nunganga avele, eneke o panes inga pompomere ole vothung na toko ulue angare ole mire, na areken o es a Krai nge me avele.

⁹Na thomu o nakalal thomu, eneke lomumu mire ako Krai i velpol ini toko ranga ve ini it, na ur alavusnga ako i voth a God nge, i voth

mun a i nge. ¹⁰Na thomu o oror nge ur e avele, eneke thomu o teo a Krai nge, na i mukal nge tamatare tomo nge ur alavusnga ako ole engenging i voth. ¹¹Na thomu o teo a Krai nge na thomu o el ile paatealing. Na ini paatealing ako tokokoere o oma i ako o is lomu,^a kene avele, ini paatealing ako Krai i oma i ako i eltetpot vothung ulue anga a thomu nge. ¹²Na nge wop lemi ako thomu o el paninuong, aken ini ile paatealing aken, na i ranga ve ako thomu o rin, na God i tetun thomu tomo nge a Krai, lama i palos werera mun thomu tomo nge i, eneke lomumuo nge a God ile engenging ako i palos werera a Krai nge rinong.

¹³Na nomenga thomu o oma lomu vothung kerenga. Na Krai i eltetpot vothung ulue anga a thomu nge rongan, na i ranga ve ako thomu o rin lale, aveto God i pamimi werera thomu tomo nge a Krai. Na ilemi simikal ler vothung kerengare. ¹⁴Aken i ranga ve ako i pavus ol ar thangarong a erere ako i wat ler vothung kerengare nge, tomo nge ile patorong ako i teltun it nge. Na i pavus ol i nge ako o sotuna a Jisas a won ngoronga nge. ¹⁵Na nge a Krai ile omaing aken, God i pathengal tokokoere ako ve, ile mong a Satan tomo nge tamatare ole engenging, na i thelal or na i pamit or a pulua otheke, lamako i palemara or.

**Te rin lale tomo nge a Krai ako i pavus ol
a Moses ile patorong panesnga.**

¹⁶Mako thomu o mothong tova o nongal areko olemi otun thomu nge ako thomu o panes Judare ole patorong avele, nge ur ako thomu o an i, na o thin i, na nge aning aoliloenga a nangre, na nge ngov ponganga a aningre, na nge nang rialonga. ¹⁷Na ur areke i ranga ve ini patongrumong ako i pathengal pompome nomengangare nge ur ako aro i velpol panen. Na ur ako i pavelpol nunganga ol ur areken ini a Krai. ¹⁸Na o mothong tova o nongal tokokoe areko ole apaltet nge ako o ri ve o paruru osivenga, na o lotual enselre, na o ri ve thomu o penthal lale, eneke thomu o panes ole riong avele. Tokokoe areken o ri pompom nge ur ako o thopol i nge oni theong, na o paroro polpol osivenga, eneke o panes inga mire ulue anga. ¹⁹Na tokokoe areken o teo lollo vet a Krai nge avele, mako opounga avele, eneke o mothong a Krai ako ini toko lemioongare opounga ako i sung aning nge ini peti elonga mo ako ini peti epipeere o engeng nge av. Na God i papoma ini peti elonga aken.

²⁰Thomu o rin tomo nge a Krai lale. Na thomu o vthopot ol nge a Moses ile patorong panesnga. Na i vova ake lomu mimiong rongan i ranga ve ini toko ako ilemio nge a Krai avele ile mimiong, e? Na i vova

^a 2:11 Paatealing neginga ako tokokoere o el i nge ako o panes a God ile riong kinnga nomenganga kene ini oni peti isnga.

ake thomu o panes patorong ako ranga ve: ²¹Mothong tova tongporum aning krim rumnga, na rom rumnga, na vugirnga, e? ²²Patorong areke i velpol nge toko ulue angare ole mire inga. Ma aning areken o velpol mo te an i, naro i vus werer mun. ²³Na patorong areke te thopol i, ma i ranga ve ako mire ninenga i pavelpol i, eneke itheki ranga ve tokokoere aro o lotu engeng, na o paruru osivenga, na o oma oni peti ranga ve ini ur polpolnga. Aveto vothung areken osivenga o pavelpol ir, ma o pavurvur aro ole mong vothung kerenga ako i mita a olemi me, kene avele.

Te los werera lale tomo nge a Krai ma te el mimiong ponganga a i nge.

3 ¹Thomu o teo a Krai nge, na i ranga ve ako God i palos werera mun thomu nge rinong, maken aro lomumu i pelo nge ur areko i voth nge wop ako Krai i men a God imeni sivenga nge anga. ²Aro lomumu inga nge ur areko a Pen a Urvet. Na o mothong tova lomumu nge ur ulue anga. ³Eneke i ranga ve ako thomu o rin lale nge vothung ulue anga omanga. Na lomu mimiong nunganga i ngo kine tomo ol nge a Krai ako a God nge. ⁴Na lomu mimiong nunganga i voth nge a Krai ipanesnga, na nge nang ako aro Krai i velpol, aro thomu o velpol tomo mun nge i nge ile tolilisong.

Krai i eso a lemir, make te velpol ini toko ponganga

(Vonge 3:5–4:18)

Te el mimiong ponganga a Krai nge.

⁵Lomu mimiong i venen re aken, mako aro thomu o so rin selelepot lomu vothung ulue anga ako i voth a thomu nge, ranga ve ini: Ngo tomoing nge toko na seng areko or ini oewo avele, na toko na seng aomngare, na theki le roroing, na lemi rumong nge vothung kerenga omanga, na sung sesong ako ini vothung ako ranga ve o lotual god le apaltetonga. ⁶Na nge vothung areken God ile lemi klingong aro i es a tokokoe areko o nongal ile riong avele. ⁷Na nomenga thomu mun o oma vothung areken nge lomu mimiong neginga. ⁸Aveto ponange aro thomu o mothong selelepot mun vothung ako ranga ve ini: Lemi klingong, na lemi velong, na ri tangatunong, na voltetong, na riong kerengare ringa. ⁹Na thomu o mothong tova lomu apaltet pel, eneke thomu o modoppot vothung nomenganga areken lale, ¹⁰na o elo ol mimiong ponganga ako Patenger i oma i. Na mimiong aken Patenger i pesrou nge ipaonolnga avele mo aro te velpol ranga ve ini i, moro aken lemir mire senu nge ur ako i sis ve aro te oma i. ¹¹Na nge lomu mimiong ponganga aken thomu o vur e pel ol. Na Judare o relpot avele nge areko or ini Judare avele. Na areko o is ole avele o vur e pel nge areko o is ole. Na toko rerepire

o vur e pel nge toko vultungare. Na toko um polpolongare o vur e pel nge tokokoe areko or ini um polpolongare avele. Eneke Krai i voth a it alavusnga nge na i mukal nge ur alavusnga.

Vothung ako nge mimiong ponganga.

¹²Maken i nunganga ako God i atéal thomu ve ini ile tokokoere na ia sagu rintet thomu, mako aro thomu o el vothung ako ranga ve ini: Lemi esaling, na vothung le sivengaing, na paruruong, na riong mosnga, na matheongre elnga. ¹³Naro thomu o potun inga matheong areko sivengomu o sung pel nge, naro lomumu simikal pel nge vothung kerenga kathnga ako lomumu i voth nge, ranga ve ako Toko Pomnga ilemi simikal lomu vothung kerenga. ¹⁴Naro thomu o engeng nge asaguong, eneke asaguong i mukal nge vothung sivenga areken, na i paengeng or mo o womlo pel nge ole omaing, na ur e avele aro i pakerenga ole omaing aken.

¹⁵Aro lomu womtun nge a Krai ile lemi moring mo i theal lomumu, eneke God i atéal thomu ve aro lemi moring i vual a thomu nge, ako ranga ve ini ini peti epipeere ako o voth pis a omei. Na evelelnga aro thomu o ri sivengaing a God nge. ¹⁶Aro lomu womtun nge a Krai ile riong mo i voth senu a lomumu. Aro thomu o pamireal na patoral pel nge mire ninenga elonga. Naro thomu o vo voing areko o voth a Buk Song lemi, tomo mun nge omu lotuonga a voingre, na voing ako Oni Riringa i pavelpol i a lomumu. Naro opomu lemi i vual nge ri sivengaing a God nge. ¹⁷Na lomu omaing elonga tomo nge lomu riong elonga aro thomu o oma ir ranga ve ako thomu ini a Toko Pomnga a Jisas ile, naro thomu o ri sivengaing a Titemer a God nge ako nge a Jisas.

Pol i ri nge tutunongare a menong.

¹⁸Thomu seng peangere thomu o nongal ewomuere ole riong, eneke ini vothung vengvenga a Toko Pomnga itheki.

¹⁹Thomu toko peangere omu sagu ewomuere na thomu o mothong tova o akrisal or.

²⁰Thomu wainlangaere thomu o nongal omu vovoere na omu ninaere ole riong elonga, eneke Toko Pomnga ilemi sivenga nge vothung aken.

²¹Thomu a vovoengaere thomu o mothong tova o ri pompom nge tutumuere ole vothung elonga, aro vene mo olemi kerere mo oni plong nge omaing sivenga e omanga.

Pol i ri nge vothung ako nge um polpolongare tomo nge ole mukalingare ole menong.

²²Thomu toko um polpolongare o nongal tokoningomure ole riong elonga. Na o mothong tova o pawomwomal or tova o mit na o the

thomu ako o um, aveto o nongal tokoningomure ole riong nge lomumu alavusnga, ranga ve ako thomu o papomnga a Toko Pomnga na o nongal ile riong. ²³Na thomu o oma lomu omaing elonga nge lomumu alavusnga ranga ve ako o oma i nge a Toko Pomnga na nge tokokoere avele.

²⁴Eneke lomumu mire ako ve, Toko Pomnga aro i sung loa olongomu nge ur ako i kin ile riong nge nomenga. Na Kraisi ini lomu mukalinga na thomu o oma inga ile omaing. ²⁵Na tokokoe areko o oma vothung kerenga aro o el oolalnga nge ole vothung aken. Na Toko Pomnga ile thopolong nge toko alavusnga i vur e pel inga a itheki.

4 ¹Thomu mukalingare thomu o oma vothung vengveng na sivenga nge lomu toko um polpolngare, eneke lomumu mire ako ve, lomu Mukalinga mun i voth a Pen a Urvet.

Aro te nong engeng na te oma vothung vengvenga.

²Aro thomu o sungpot lomu mimiong nge nongong, na o thealal, na o ri sivengaing a God nge. ³Naro thomu o nong mun nge them mo aro God i thep sovengalo nge lemepanongpolong mo aro them pavurvur aro them panongpol nge a God ile riong nge a Kraisi ako i ngo kine nomenga. Ave toko pelie oni plong i, mako o paeso tho a mang a midenga nge.

⁴Naro thomu o nong mo aro tho panongpol pat ol ile riong aken, ranga ve ako i sis ve aro tho oma i. ⁵Na thomu o the senu nge nang elonga ako thomu o sangpolo tokokoe areko olemio nge a Kraisi avele, naro thomu o panes lemi rumong ninenga nge sovengalo kathnga ako aro o elo or nge. ⁶Naro lomu riong alavusnga aro i vual nge themosaling, na i mosisen mo aro tokokoere o nong sial i, naro thomu o olal senu ole ninong elonga.

Pol i pasungalu ile nang sivenga nge ithangangaere ako a Kolosi.

⁷Titeir a Tikikus ako emem sagu i ako ini toko opoalinga sivenga na ini a Toko Pomnga ile umonga tomo nge them, aro i ritet thomu nge tho. ⁸Naro tho pake i a thomu nge wot mo aro i ritet senu thomu nge lemepanong ake mo aro i paengeng lomumu. ⁹Naro i es tomo nge titeir a Onesimus ako emem sagu i ako i panes senu a Toko Pomnga na ini lomu rem lemia. Naro or paini o ritet thomu nge ur alavusnga ako i velpol ol a them nge. ¹⁰Na Aristarkus ako i voth tomo nge tho a mang a midenga, i pasungalu ile nang sivenga a thomu nge. Na Mak ako ini a Barnabas ile lavokunga i pasungalu mun ile nang sivenga a thomu nge. (Na thomu o el malueng lale ako i ri ve, aro ve Mak i velpol a thomu nge, aro thomu o nongpoo i.) ¹¹Na Jastus ako i ion aininga a Jisas i mun kene i pasungalu ile nang sivenga a thomu nge. Na toko or me inga aken or ini Judare nge areko o um tomo nge tho nge panongpolong nge a God ile menong e nepes. Na o paengeng lemik nge omaing aken. ¹²Na Epapras ako ini lomu rem lemia ini mun i a Kraisi Jisas ile umonga, na i pasungalu mun

ile nang sivenga a thomu nge. Na i mostun nongong nge thomu, na i nong engeng mo aro thomu o mit engeng nge ur areko God i sis ve aro thomu o oma i, naro thomu o motu nge lomum mire nge ve i nunganga. Ma i nong ve aro thomu o panes vengveng inga a God ilemi.

¹³Sivengek tho thopol ile omaing engenga nge thomu tomo nge toko lemioongare ako a Laodisia na Hierapolis. ¹⁴Titeir a Luk ako emem sagu i ako ini vuralinga tomo nge a Demas or paini o pasungalu mun ole nang sivenga a thomu nge. ¹⁵Aro thomu o pasungalu mun lek nang sivenga a toko lemioongare nge ako a Laodisia na o pasungalu mun lek nang sivenga a Nimpa tomo nge toko lemioongare ako o pathun a ile vel lemi.

¹⁶Na nge nang ako ve, thomu o tital malueng ake lale, aro thomu o sung es mun i a toko lemioongare nge, ako a Laodisia na thomu aro o tital mun lek malueng ako tho wat i a Laodisia angare nge.

¹⁷Naro thomu o ria Arkipus ve i sivenga ako aro i patopalal a Toko Pomnga ile omaing ako i sungu i a i nge.

¹⁸Tho a Pol tho wat riong pasungalinga ake nge sivengek menik ol. Na lomumu rum mun tho nge lek menong a mang a midenga lemi. God ile themosaling aro i voth tomo nge thomu.

Na i re aken. I vus.